

LIGJI NR. 08/L-156**PËR NDRYSHIMIN DHE PLOTËSIMIN E LIGJIT NR. 06/L-124 PËR SHËRBIM NË FORCËN E SIGURISË SË KOSOVËS****Kuvendi i Republikës së Kosovës:**

Në bazë të nenit 65 (1) të Kushtetutës së Republikës së Kosovës,

Miraton:

LIGJ PËR NDRYSHIMIN DHE PLOTËSIMIN E LIGJIT NR. 06/L- 124 PËR SHËRBIM NË FORCËN E SIGURISË SË KOSOVËS**Neni 1**

Ky ligj ka për qëllim ndryshimin dhe plotësimin e Ligjit Nr. 06/L-124 për Shërbim në Forcën e Sigurisë së Kosovës.

Neni 2

Neni 3, pas paragrafit 1., nën-paragrafi 1.14. të ligjit bazik, shtohen nën-paragrafë të rinj me numër 1.15. dhe 1.16. me tekstin si në vijim.

1.15. Pastërtia e figurës - vlerësimi që i bëhet figurës së kandidatit që aplikon për shërbim në FSK nga Bordi për Pastërtinë e Figurës, bazuar në informacione të ligjshme të institucioneve të Kosovës për vlerësimin e përshtatshmërisë së personit për shërbim në FSK, me qëllim të ruajtjes së integritetit dhe besueshmërisë së institucionit.

1.16. Karriera ushtarake - është rendi i përgjegjësive të pjesëtarit të FSK-së gjatë kohës së shërbimit në FSK, në përputhje me arsimimin, kualifikimin, aftësitë drejtuese, profesionale dhe kohën e shërbimit.

Neni 3

Neni 6, paragrafët 3., 4. dhe 6. të ligjit bazik, ndryshohen si në vijim:

3. Mosha minimale për t'u rekrutuar në Forcën e Sigurisë së Kosovës është:

3.1. tetëmbëdhjetë (18) vjeç ditën e fillimit të javës zero për kadet;

3.2. tetëmbëdhjetë (18) vjeç ditën e mbylljes së konkursit për ushtarë.

4. Kandidati i cili aplikon për shërbim në FSK ditën e mbylljes së konkursit, të mos jetë më i vjetër se:

4.1. tridhjetë (30) vjeç për oficer me kualifikime të veçanta specialistike;

4.2. njëzet e pesë (25) vjeç për nënoficer të rangut rreshter (OR5) me kualifikime të veçanta specialistike;

4.3. njëzete e dy (22) vjeç për kadet;

4.4. njëzet e pesë (25) vjeç për ushtar.

6. Pranimi në FSK bazohet në gjendjen shëndetësore dhe fizike sipas nevojave e

prioriteteve të FSK-së dhe pas përfundimit me sukses të procedurës së verifikimit të sigurisë, respektivisht pastërtisë së figurës, të përcaktuar me Rregulloren e Pastërtisë së Figurës për pjesëtarët e FSK-së të nxjerrë nga Ministri.

Neni 4

Neni 7 pas paragrafit 1. të ligjit bazik, shtohet paragrafi i ri 1A me tekstin si në vijim:

1A. Rekruti ditën e përfundimit me sukses të trajnimit bazik, ndërsa kadeti ditën e fillimit të studimeve ushtarake pas përfundimit me sukses të javës zero, bën betimin dhe i lëshohet urdhër-emërimi.

Neni 5

Neni 9, pas paragrafit 2. të ligjit bazik, shtohet paragrafi i ri me numër 3. me tekstin si në vijim:

3. FSK-ja në bazë të nevojave të veta në kushte të barabarta u ofron pjesëtarëve arsimim, stërvitje, trajnim dhe zhvillimi të udhëheqësve në FSK, me qëllim të përgatitjes dhe aftësimin të tyre profesional për kryerjen e detyrave dhe zhvillimin e karrierës. Në zbatim të këtij paragrafi Ministri nxjerr akt të veçantë nënligjor.

Neni 6

Neni 10 i ligjit bazik ndryshohet si në vijim:

Neni 10 **Vlerësimi vjetor**

1. Vlerësimi vjetor i ushtarakut është procesi i verifikimit të përgjithshëm vjetor i realizimit të objektivave të përcaktuar në detyrë, i aftësive apo dobësive të ushtarakut në kryerjen e detyrave, si dhe cilësive etike e morale të tij. Vlerësimi i rezultateve synon përmirësimin e aftësive profesionale dhe të cilësisë së shërbimit nga ushtarakët.

2. Ushtaraku vlerësohet në një nga këto nivele:

- 2.1. “shkëlqyer”;
- 2.2. “shumë mirë”;
- 2.3. “mirë”;
- 2.4. “mjaftueshëm”;
- 2.5. “nën mjaftueshëm”.

3. Ushtaraku i cili vlerësohet dy (2) vjet radhazi më notën nën “nën mjaftueshëm” i shkëputet kontrata dhe lirohet nga shërbimi.

4. Kriteret, procedurat dhe formati i vlerësimit vjetor përcaktohen me akt nënligjor të nxjerrë nga Ministri.

Neni 7

Neni 16, paragrafi 4. i ligjit bazik ndryshohet si në vijim:

4. Të drejtën e shfrytëzimit të ushqimit, akomodimit dhe transportit e kanë pjesëtarët aktiv, kadetët dhe rekrutët e FSK-së. Rregullat për ushqim, kriteret, procedurat dhe mbikëqyrja, rregullohen me akt të veçantë nënligjor të nxjerrë nga Ministri.

Neni 8

Neni 26, pas nën-paragrafit 1.17. të ligjit bazik shtohet nën-paragraf i ri 1.18., me tekstin si në vijim:

1.18. Pjesëtarët e FSK-së të cilët ndjekin trajnime, shkollime gjatë shërbimit në FSK, janë të obliguar të shërbejnë dyfishin e kohës së shkollimit/trajnimit, e cila rregullohet dhe përcaktohet me kontratë të trajnimit/shkollimit.

Neni 9

Neni 27 i paragrafi 3. i ligjit bazik ndryshohet si në vijim:

3. Bordi për Shqyrtimin dhe Zgjidhjen e Ankesave në FSK emërohet nga Ministri i Mbrojtjes, me mandat dy (2) vjeçar me mundësi vazhdimi edhe për një mandat. Bordi përbëhet nga tre (3) oficerë, kryesuesi me gradë gjeneral dhe dy (2) anëtarë oficerë.

Neni 10

Neni 28 i ligjit bazik ndryshohet si në vijim:

Neni 28

Kodi etikës dhe kodi disiplinor

1. Pjesëtari i FSK-së është i obliguar t'i respektojë vlerat dhe standardet e etikës të caktuara me Kodin e Etikës për FSK-në të nxjerrë nga Ministri.

2. Pjesëtari i FSK-së bart përgjegjësi disiplinore dhe do t'u nënshtrohet procedurave disiplinore kurdo që paraqiten dyshime të bazuara për shkelje të standardeve të disiplinës apo të etikës me veprimin apo mosveprimin e tij.

3. Ndaj pjesëtarit të FSK-së për shkelje të rëndë disiplinore shqiptohet vetëm njëra nga këto sanksione disiplinore:

3.1. largim nga FSK-ja;

3.2. transferim;

3.3. gjobitje në pagë, ku paga mujore mund të zbritet prej gjashtëmbëdhjetë për qind (16%) deri në tridhjetë për qind (30%) në muaj për një periudhë kohore prej tre (3) deri në gjashtë (6) muaj.

4. Për shkelje të lehtë disiplinore shqiptohet vetëm njëra nga këto sanksione:

4.1. vërejtje me shkrim;

4.2. gjobitje në pagë, ku paga mujore mund të zbritet prej pesë për qind (5%) deri në pesëmbëdhjetë për qind (15%) në muaj për një periudhë kohore prej një (1) deri në tre (3) muaj, dhe

4.3. sanksionet e atëçastshme.

5. Oficeri me gradën nëntoger e lart për pjesëtarin në varësi të drejtpërdrejtë apo nën komandë ka të drejtë të shqiptoj sanksione të atëçastshme, të fillojë procedurat disiplinore dhe të shqiptojë sanksionin për shkelje të lehtë disiplinore.

6. Nënoficerët nga grada OR5 e lartë për pjesëtarin në varësi të drejtpërdrejtë apo nën komandë, mund të shqiptojnë sanksione të atëçastshme.

7. Bordet Disiplinore të FSK emërohen në nivel Shtabi dhe Komande dhe janë autoriteti vendimmarrës për shkeljet e rënda disiplinore.
8. Bordi për Ankesa Disiplinore emërohet nga KOMFSK dhe është autoriteti vendimmarrës për të gjitha ankesat kundër vendimit të Bordeve Disiplinore të FSK.
9. Pjesëtari i FSK i sanksionuar ka të drejtë të parashtrojë ankesë përmes oficerit të tij iniciues brenda afatit prej dhjetë (10) ditëve nga dita kur pjesëtari është njoftuar me sanksionin apo pranon vendimin me shkrim.
10. Përgjashtimisht nga afati ankimor sipas paragrafit 9. të këtij neni, ankesa bëhet për sanksione të atçasshme, të cilën brenda pesë (5) ditëve, e dërgon tek oficeri i parë në zinxhirin komandues të ushtarakut që i ka shqiptuar sanksionin, për trajtim dhe vendosje.
11. Llojet e shkeljeve dhe procedurat disiplinore rregullohen më Kodin Disiplinor për pjesëtarët e FSK-së të nxjerrë nga Ministri.
12. Procedurat dhe afatet kohore të përcaktuara me këtë ligj dhe me Kodin Disiplinor të FSK-së, nuk zbatohen për Kadet dhe Rekrutet e FSK.
13. Kadetët dhe rekrutet e FSK-së janë të obliguar të respektojnë këtë ligj dhe dispozitat e legjisllacionit në fuqi.
14. Zhvillimi i procedurave për shkelje disiplinore, afatet kohore të ankesave, llojet e shkeljeve dhe sanksionet për kadetin dhe rekrutin e FSK do të caktohen me akt të brendshëm nga KOMFSK duke iu përshtatur rregullave ushtarake dhe rregullave të shkollës.

Neni 11

Neni 30 i paragrafi 4. i ligjit bazik ndryshohet si në vijim:

4. Në rastet kur pjesëtari i FSK-së ndalohet dhe arrestohet nga Policia e Kosovës, njoftohet Policia Ushtarake.

Neni 12 Aktet nënligjore

1. Aktet nënligjore të parapara me këtë ligj nxirren në afat prej më së largu dymbëdhjetë (12) muaj nga hyrja në fuqi e këtij ligji.
2. Aktet nënligjore që janë në fuqi vazhdojnë të zbatohen, deri në nxjerrjen e akteve të reja nënligjore, me kusht që të mos jenë në kundërshtim me këtë ligj.

Neni 13 Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 08/L-156
10 nëntor 2022**

Shpallur me dekretin Nr. DL-331/2022, datë 25.11.2022 nga Presidentja e Republikës së Kosovës Vjosa Osmani-Sadriu